

# Tavau – dals bains dals Gualsers

## al lieu da cura e da congress

**■ La regiun da Tavau è veginida urbarisada èn in'empresa fasa da purs rumantschs e colonisada silsuenter tras Gualsers. En il 19avel tschientaner è Tavau sa sviluppà ad in center internaziunal da cura e da vacanzas e furma oz – sper Cuira – il sulet abitadi en il Grischun cun varga 10 000 abitants.**

### Pass dal Wolfgang

Passadi a 1631 m che collia Claustra cun Tavau. Il Wolfgang appartegna a l'intschess idrografic da la Landquart. Tenor Durich Chiampell (ca. 1570) sa nummava quel intschess antruras *Badingiu*, vul dir cuintrada da guauds da badugns. En quella existiva a ses temp ina chaplutta, erigida a l'ur da la via e dedigada a s. Wolfgang, ma ida en muschna già dal temp da Chiampell. A chascun da la construziun da la Viafier retica il 1890 ha il Wolfgang obtegnì in'atgna stazion. En sia vischinanza existan oz in hotel, ina chasa da cura (clinica alpina per asmatiche), diversas interpresas e chasas da vacanzas.

Martin Bundi

### Davos (Tavau)

Vischinanza politica, cirquit Tavau, disstrict Partenz/Tavau (fin il 2001 Landquart Sura), situada en la Val da la Landwasser, cun las fracciuns da Tavau Vitg, Tavau Plaz, Frauenkirch, Glaris e Monstein e cun plirs aclaus en la val principala (Laret, Wolfgang, Clavadel, Spina e.a.) e divers abitadis en las vals laterales dal Flüela, Dischma e Sertig, a partir dal 2009 era cun la fracciun da Tain. Tenor la surfatscha è Tavau la segund gronda vischinanza da la Svizra e la pli gronda vischinanza dal Grischun. 1213 *Tavaus*, tudestg Davos (uffizial). La vischinanza politica da Tavau corrisponda al cirquit da Tavau e cumpiglia in territori che s'estenda dal Schwarzsee (Laret) sur l'intschess da la Landwasser fin a la chavorgia al pe dal Silberberg (Monstein). L'schenenumnà Oberschnitt (vallada larga) cunfinescha sut Frauenkirch cun l'Unterschnitt (strengga cun numerus valluns). 1850 1680 abitants; 1888 3891; 1900 8089; 1930 11 164; 1950 10 433; 2000 11 417.

Singuls objects dal temp da bronz, scuverts sin l'Alp Drusatscha, al Lai da Tavau ed al Pass dal Flüela, cumprovan l'existenza d'ina ruta da transit preistorica dal Partenz a Tavau e Susch. La vallada è dentant veginida urbarisada e colonisada pir en il temp autimedieval da purs rumantschs, immigrads da la Val d'Alvra e da l'Engiadina. Il pli vegl document datescha dal 1213 e cumprova la cultivaziun originara dal terren a Tavau tras Rumantschs (prada e pastgiras) che pajavan tributs a lur suveran, il chapitel catedral da Cuira, en furma da nuras e da chaschiel produci sin il bain da Kristis (bandunà pli tard). Il 1297 è quest bain, in regal da la chaplutta da Brinzauls a Bolgen, passà als Wildenbergs. Enturn il 1280 aveva Walter IV von Vaz domicilià la Gualsers e fusiunà ils dus bains rumantschs cun 12 bains gualsers ad ina cooperativa. En la brev da vasalladi e da tschais dal 1289 èn attestads tributus considerabels en furma da chaschiel, nuras e ponn e l'obligazion da prestar servetsch militar, ma era libertads persunals ed il dretg d'exequir la giurisdicziun bassa e da metter in agen mastral. La giurisdicziun criminala veginiva exequida dals baruns de Vaz. Suenter lur extincziun è il domini passà il 1338 tras ierta als Toggenburgs, il 1436 als Montforts-Tettnang ed il 1466 a la Chasa d'Austria (Habsburg). Il 1649 è la vischinanza da Tavau sa cumprada libra da quel domini.

L'emprima baselgia (patrums: s. Maria, s. Gion Battista, s. Niclò) è attestada il 1335 a Tavau Plaz. Questa baselgia, consecrada a s. Gion, era la baselgia principala da la regiun da Tavau ed aveva traïs chaplanias: quella da s. Teodul a Tavau Vitg (construïda enturn il 1350), *unser frowen*



Sco sedia dal WEF furma Tavau oz in lieu da congress da renum mundial.

*kilch* a Frauenkirch (menziunada il 1466) e la chaplania da s. Niclò a Glaris (enturn il 1350). Enturn il 1500 è menziunada la baselgia da s. Gion sco *frye pfarkilchen*. La collatura appartegneva a la vischinanza da Tavau ch'ha adoptà la cretta reformada il 1526. En il 17avel e 18avel tschientaner èn las suandantas chaplanias daventadas plaiws autonomas: Glaris cun Monstein il 1654, Frauenkirch cun Sertig il 1680 e Tavau Vitg cun Laret il 1680. Il 1719 è Monstein sa separà da Glaris ed ha engaschà in agen plevon. Novas baselgias èn veginidas construidas a Monstein (1668), Sertig (1699) e Laret (1793). Chapluttas bandunadas existan sin il Wolfgang ed a Pedra en la Val dal Flüela (menziunada il 1562 sco *bef by der cappel*, oz Dörfli). La vischinanza da Tavau disponiva a l'entschatta dal 21avel tschientaner da 15 baselgias. La gronda part dals abitants è refurmada.

Il 1328 ha Tavau cumprà da Susch la Val dal Flüela ed extendì qua tras sias pastgiras communalas. A l'entschatta dal 14avel tschientaner en emigrads Gualsers da Tavau ad Arosa ch'è daventà in vischinadi da Tavau (separaziun 1851). Ils numerus bains da Tavau èn sa sviluppads a las fracciuns istoricas che decidian anc oz en atgna competenza davart dumondas da scola e da sepultura e che disponan per part dad atgnas facultads (vala era per la nova fracciun da Tain). L'emprima ediziun dal «Davoser Landbuch» datescha dal 1596. La schientscha politica da la gieud da Tavau è manifestada il 1564 suenter l'incendi da la veglia chasa communal, in edifiци da lain substitui d'ina chasa da crap renaschimentala, realisada sper la baselgia principala tenor ils plans da Hans Ardüser cun ina stiva gronda (sala dal cussegli cun picturas da vaider) ed ina stiva lunga. Tavau era la chapitala da la Lia da las Diesch Dretgiras (fundada il 1436) ed ospitava en roda cun Cuira e Glion mintga tschintgavel onn la Dieta da las Trais Lias. En la stiva lunga veginivan salvadas la Dieta sezza e las radunanzas communalas, en la stiva gronda las sedutas da dretgira.

A partir dal 14avel/15avel tschientaner è la regiun da Tavau veginida germanizada tras Gualsers. Economicamain han predominà dal 14avel al 16avel tschientaner l'allevament da muvel (chaschiel, export da muvel, ponn da launa-nursa), l'explozaziun da metals en las minieras al Silberberg en l'Unterschnitt (Monstein, fin il 1848; export dals metals ad Alla, Bulsaun, Buorm e Sunder) sco era l'import da graun e da sal dal Tirol sur il Pass dal Flüela e da vin (sauma) da la Vuclina sur il Sca-

letta. Grazia al success economic a l'exterior han las veglias chasas da lain pudì vegnir engrondidas u remplazzadas tras chasas da crap. La pestilenzia, guerras e fominas han provocà a l'entschatta dal 17avel tschientaner ina ferma depopulaziun. Il destin da Tavau veginiva determinà oravant tut da las famiglias Beeli, Buol, Guiler, Jenatsch, Sprecher e Valär ch'han lascià eriger dal 16avel al 18avel tschientaner chasas burgasas representativas.

Cun la scuverta da la forza curativa dal clima alpin per malsognas dal lom en il 19avel tschientaner ha Tavau cumenzà a sa transfurmar ad in center internaziunal da cura e da vacanzas. Il 1841 ha avert Lüzius Rüedi ina chasa per uffants malsausa dal lom e da las glondas dal culiez. Enturn il 1853 ha scuvert il medi Alexander Spengler il clima curativ da Tavau sco remedi cunter la tuberculosa. A partir dal 1865 èsa sviluppà Tavau ad in lieu da cura permanent cun sanatoris, hotels ed in'empresa viafier. Ils giasts da cura ed ils fugitivs politics han conferi a Tavau in caracter internaziunal (Thomas Mann, Ernst Ludwig Kirchner e.a.). La populaziun è creschida considerablamain. Sper edifizis erigids en il stil floreal e neoclassistic èn veginidas construidas a Tavau a partir dal 1900 chasas en novas furmias e stils, per exemplu las chasas cun tetg plat u en stil cubic (Pfleghard & Haefeli: Sanatori Schatzalp; Rudolf Gaberel: Chasa da cura, chasa-cumin). In faktur essenzial per il svilup dal lieu da cura è stà la lingua da la Viafier retica Landquart-Tavau, averta il 1890. Il piunier da questa collazion è stà l'hotelier da derivanza ollandaesa Willem Jan Holsboer ch'era sa domicilià a Tavau il 1867. Suenter il 1900 è Tavau daventà in impurtant lieu per sports d'enviern. En ils onns 1920 (onns dad aur) è Tavau sa sviluppà ad in impurtant lieu da vacanzas, trantner auter grazia a las concurrenzas da sport cun participaziun internaziunal (p.ex. Spengler-Cup dapi il 1923). Suenter la crisa economica mundiala è Tavau sa transfurmar d'in center da cura da la noblezza ad in lieu da cura e da sport per in e scadin: il 1930 cun la construziun da pendicularas e runals (Funiculara Parsenn) e da l'emprim runal cun staffa dal mund a Bolgen 1934. Fin a la Segunda Guerra mundiala ha alloschà Tavau ina gronda colonia da Tudestgs attratga trantner auter dal Fridericianum, ina scola d'internat da la Germania, averta il 1878 e refundada il 1946 sco Scola media alpina svizra. A Tavau residiva era il manader da la sezioni svizra da la NSDAP, Wilhelm Gustloff, assassinà il 1936 dal student gi-

dieu David Frankfurter. Las novas metodos, sviluppadas en ils onns 1950 cunter la tuberculosa, han fatg svanir la plipart dals sanatoris a Tavau. Il 2000 existivan anc 10 sanatoris, da quels quatter da l'exterior, oravant tut clinicas per curar allergies. La construziun moderna dal Center da congress (1969) e da l'Hotel da congress (1982) ha attrat in turissem economic foggia lucrativ a Tavau (trantner auter il Forum economic mundial WEF). Ils davos onns ha Tavau vivì in boom da construziun, oravant tut en consequenza dal svilup d'in turissem da massa bunmartgà. Il 2000 aveva Tavau 19 funiculars, 17 runals, pliras patineras, bogns, ina halla da sport sin glatsch (dapi il 1981), plazzas da golf e da tennis sco era scolas da skis e da passlung. Il 2005 l'avuravan passa 80 % da las personas cun activitat da gudogn a Tavau en il sectur terziar, strusch 4 % en l'agricultura. Tavau posseda in sistem da scola bain sviluppà in spital regional ed ina chasa d'attempads, ina biblioteca rejunala, il Museum da minieras grischun (a Schmelzboden/Monstein), il Museum Ernst Ludwig Kirchner (a Tavau Plaz) ed in museum regional (en l'antiera pravenda da Tavau Vitg). Tavau è la sedia da l'Institut federal per la perscrutaziun dal guaud, da la naiv e da la cuintrada e da l'Institut svizzer per la perscrutaziun dal clima autalpin e da la medischina. L'infrastructura da Tavau patescha oravant tut dal traffic d'autos. Malgrà il svilup dal traffic public (bus locals, autos postals, Viafier retica, Funiculara Parsenn) e la chanalisaziun dal traffic privat (traffic en direccziun unica sin vias da transit) stagnescha il traffic savens durant la stagion auta; ils effects da la polluziun da l'aria sin l'ambiente (guaud ed auter) èn evidents.

Las autoritads politicas da la vischinanza e da la regiun da Tavau consistan dal cussegli grond (legislativa), dal cussegli pitischen (executiva) sco era d'in mastral che presidiescha omadus cussegli. Quests gressi vegnam elegids mintga traïs onns da la terza dumengia da matg da la mastralria regionala (Landschaftsbeamt). Omadus cussegli èn attestads dapi il 1468. Il dretg da vuschar da las dunnas sin plaun local è vegnì introduci il 1970. Il cirquit da Tavau exista dapi il 1851 ed è territorialmain identic cun la vischinanza da Tavau. La mastralria cirquitala (Kreisbatsitz) elegia mintga traïs onns l'emprima dumengia da matg a l'urna il president cirquital, l'intermediatur (derschader da pasch), la dretgira cirquitala (dretgira penala d'emprima instanza fin il 2001) ed ils deputads.

Martin Bundi

### Clavadel

Aclau en la vischinanza politica da Tavau, situà a 1664 m a l'entrada en la Val Sertig. Il num Clavadel deriva dal latin *tabulatum*, rumantsch clavà. A l'entschatta da la colonisaziun da la regiun en el temp medieval tardiv sa chattava qua probablamain mo in clavà. Fin viaden il 19avel tschientaner consistiva Clavadel da bains purils. En ils onns 1830 han ins erigi a Clavadel in bogn da zulper (daventà victima d'in incendi il 1892), il 1890 ina chasa da cura ed il 1902-03 in sanatori, incorporads il 1916 en il Sanatori Wald/Turitg (oz clinicas da reabilitaziun/Zürcher Höhenkliniken Wald und Davos). Sper chassas da personal, numerus chalets ed in hotel a Clavadel, è actualmain era l'Alp Clavadel (1934 m) accessibla ed abitada l'entir onn. Construziun da la Chasa dals amis da la natira 1933. Martin Bundi

### Sertig

Il num Sertig designescha ina val sco era in pass e deriva dal latin *surgere*, rumantsch s'elevat, u dal talian dal nord *sortiva*, rumantsch funtauna. L'emprima menziun Sertig datescha dal 1400. La val lateralna s'estende da la regiun da Tavau cumpiglia plirs bains, per exemplu Clavadel e Gaschurna, sco era Sertig-Dörfli (1861 m). Il Sertig aveva da pajar tschais al chapitel catedral da Cuira. L'emprima colonisaziun è succedita tras Rumantschs, immigrads per part probablamain dal Montafun. A partir dal 14avel tschientaner èn immigrads Gualsers. Sertig-Dörfli era enturn il 1562 ina culegna permanenta, ed il 1699 possedeva la val in'atgna baselgia. Da la fin dal 18avel tschientaner derivan recipients ed uras da lain construids dals abitants da Gaschurna. Dal Chüealptal maina ina senda sur il Pass dal Sertig (2739 m) als lais da Ra-vais-ch e tras la Val Tuors a Bravuogn. Il pass n'ha g' nagi'n' importanza per l'istoria dal traffic da transit e serva oz sulettamain ad intents turistics ed alpinistics. Dapi il 1999 exista a Sertig-Dörfli in nov hotel (Walserhaus), avert la stad e l'enviern. La Val Sertig posseda in territori d'alp apprezzia ed ina via cun collazion d'auto postal durant ils mais da stad. Martin Bundi

### Monstein

Fracziun da la vischinanza politica da Tavau, situada a 1626 m al sid da Tavau sin la spunda sanestra da la Val da la Landwasser. 1494 *Mastein*, *Mustein*; 1526 *Mostein*. 1689 178 abitants; 1900 127; 2001 177. Il num deriva dal latin *monasterium* e sa referesch probablamain ad in bain claustral (*curtis*) ed a servs da la claustra da Curvalda. Monstein ha furmà a partir dal 1654 ina plai cun Glaris, da la quala la vischinanza è sa separada il 1719, constituid ina pravenda cun in agen reverenda. L'emprima baselgia, construida en ils onns 1668-70, è vegnida bandunada il 1896, cura ch'ins ha realisà in edifizi nov al nord dal vitg. La populaziun da Monstein, che posseda atgnas alps, viva oravant tut da l'agricultura. Il servetsch d'auto postal collia il vitg cun la stazion Tavau-Glaris da la Viafier retica. La scolina e la scola elementara da la fracciun èn indizis per la vitalitat da Monstein. Il 1999 è vegnida fundada l'Uniu Pro Monstein. Martin Bundi

### Lexicon Istorick Retic

Il LIR cumpiglia bundant 3100 artitgels (geografics, tematics, artitgels da famiglias e biografias) davart l'istoria grischuna/retica e la Rumantschia. Editura: Fundaziun Lexicon Istorick Svizzer; versiun online: www.e-lit.ch; versiun stampada: www.casanova.ch u en mintga librarria.